

顏山雜記



序

孝人之為鄉於縣最僻



川清麗民風樸愿城之者王先

生元美記之者李先生于鱗于

鱗之文頗奇偉而地與事皆不

序一

甚切實蓋李先生平與王最深其

為文特欲侈大之已耳固未嘗

身至其地而詳考其父老子弟

也然王公之城孝水也襟阜帶

溪向背得所高岫霞蒸清泉脉

錯自是百年以來民生日繁人
文日興變亂之後歸然獨完其
功豈可忘哉李所為文蓋於王
為不誣而於孝鄉則少踈矣城
東秋谷魏別駕祠有馮文敏鍾

序二

司空二公碑文亦雅健可喜其
於風土交涉頗狹予少年稍知
讀書每悵然有感夫境地必待
人而顯而人之文辭非工弗傳
故勝區名作常患不相值若幸

得之而言之失真考之不詳亦
猶之乎不相值而已相國泚亭
孫公徃與予共硯席亦懷此歎
今垂三十年矣茲公以謝病暫
歸里居多暇因成顏山雜記四

序三

卷寄以示予予讀之簡而有法
潔而多姿上追考工爾雅下亦
不失應劭酈道元其文之工足
以傳遠而其實則父老子弟所
終日耳而目之里巷誦說無異

物無異辭也昔云元氣之融結
為山川而山川之竒莫不有所
鍾以自見孝水之受名舊矣自
王先生城之又且百餘年傳記
所載碑版所垂非不衆多也而

序四

二且信者不假於異邦之人而
卒出於公則吾孝鄉之山川誠
亦靈矣哉

康熙丙午徂暑同學趙進美題

序

余幼讀書談鄉里事嘗有二疑一龍圖范老本
吳人嘗守青州青州至今傳范井固也何顏城
僻在深山乃亦有范泉將無影響又陳仲子者
旣隱處於陵皇甫謐高士傳及劉孝標世說新
語注又有適楚見聘之文且賴妻言而止以仲
子窮餓又動與妻俱意楚國遠矣安從得車糧
資此遠舉後讀宋史乃知仲淹少長于長山及

顏山雜記

序

舉進士第一猶名朱說舊讀書長白山而此泉
亦其寄蹟非宦蹟也又讀春秋傳魯成公九年
而楚入渠丘後竟滅莒又滅魯直與齊接今顏
山上古長城乃齊楚之防塞去於陵百里耳當
仲子世魯雖未滅意楚人狡焉啓疆逼齊已甚
卽遠不過二三百里耳因歎人不讀書見聞寡
陋以視天下事固鮮不影響者也甲辰冬余病
罷官兀兀歸臥以山居少累遲之越歲目漸能

視腕漸能書屬長夏無事兼所居近山松下多
風亦不甚暑聊疏鄉里間事以遣懷或一日間
日三數日輒得一條手自錄之數月遂成卷帙
因題曰顏山雜記以示友人蒙曰是當爲顏城
作志余曰志家文繁而不殺蓋細大畢舉皆須
有義例茲余所記特里巷細言紀近不能及遠
矧嚮者諸鄉先輩郡有志邑有志志邑而鄉舉
矣安用枝指爲曰然則不失爲荆楚歲時記華

顏山雜記

序

二

陽人物志耶余曰彼子虛三都之舊倣詭瑰麗
筆不勝書茲顏城三里山郭耳競爲其書恐亦
不得也

康熙四年歲次乙巳秋七月朔泚園灌長識

顏山雜記

益都孫廷銓伯度纂

空



山谷

蓋泰岱之陰連山二百里斷而復起然後有長白故圖經曰長白岱之北輔也其二百里間山大如長白者多有圖經皆無專名明乎皆泰岱之支麓義不得有專名也辟言地大者雖復千里一以州舉之此其義也雖然山大矣民衆矣

顏山雜記

一卷

一

同在山中莫適名也則言不順於是乎地從主人或以方或以物或以人或以水泉草木各意贈之辟猶遺賢在野鄉人得私謚焉此其義也
孝鄉之山北望長白東連郡郭其大者宜從郡不從鄉然郡于岱遠鄉于岱近其自岱來者先從鄉後從郡矣蓋環城而近有南之峨嶺焉東之荆阜焉西之鳳嶺焉北之鶴崖虎山焉自岱來望顏城而先入與萊人共之者有嶺西之禹

峯土門西之樵嶺闕下之蕪口嶺焉自岱來趨長白而去欲去不去延佇於淄青之界者有峪口之雙山臺南之八子砦焉自岱來循萊蕪谷而東去復折而西以啓峩嶺之秀者有東南之岳陽黑山焉郡志失其什九山中之人間日補綴凡其自效於茲鄉者皆得錄而存之以示後之居是鄉者得攷其畧焉

峩嶺 峩嶺者峩嶺也峩嶺也者蛾眉也山形

顏山雜記

一卷

二

秀曲如眉之臨目也北來者十里間遙見四山高寒一峯隱秀樓閣三成在青蒼烟靄中峩嶺上文昌祠也在城南關

鳳皇嶺 其山南接樵嶺北連西崖迢迢不極一峯迴注北翔而南折如鳳鳥之矯翼然山半有玉皇宮石樓古木時出清鐘遙對長河岸柳淺浦沙汀歷歷行人閒閒魚鳥最爲幽絕在峩嶺西南隔水對峙

玉皇宮宋刻四聖御押

太祖

一

太祖

一

真宗

一

真宗

右一押泐闕

四代皇帝御書押字謹命工再模刻于石朝

顏山雜記

一卷

三

夕瞻禮上答聖恩宣和乙巳重六月神霄玉

清宮賜紫道士闕

宋碑肖蓬瀛亭記 乘鸞跨鶴神仙之勝遊

瀛海蓬萊洲島之絕境世之人喜道神仙中

事然不過傳記所載聞而知之者耳顏泉山

水之富冠絕瀛境巖居川觀蓋千餘家而居

民之東幽谷有泉晝夜混混盈而不竭是為

二女眾泉合流穿雲透石潺潺焉瀉出于兩

山之間是爲東谿山山之陰支分派引不假
疏導灌溉蔬圃五六十區是爲平流平流之
側張君道源別業在焉南際谷口東接水涯
鑿池匯泉植蓮養魚洲渚其中發以巨石構
亭其上橋梁固而鯨背高畫舫迴而漣渚碧
極目周視烟嵐四圍凭檻俯觀花木叢蔚隨
所矚寓皆足以滌塵襟而爽心目故能使人
躑到忘歸每來終日勝地若斯豈數見於人

顏山雜記

一卷

四

間世哉克肖蓬瀛信非虛語其始鑿池余嘗
爲賦詩今亭旣成復屬余爲記夫惟處市廛
而有林泉之志厭俗囂而思物外之遊自非
性識明達字量夷曠孰能與此道源其庶幾
乎大觀己丑季秋五日新秦臺理曹掾李桓
記

元碑 天之理一耳氣之運行亦一耳故心
外無天天外無道舍心而求天舍天而求道

猶適越而北轅其謬甚矣自漢武立通天之
臺候神之館承露之盤雖爲覲福而設亦未
聞廟而奉天帝也唐明皇祖老聃始宮太清
于亳邑宋真宗奉天書始宮玉清昭應于汴
都又諸宮觀或置使以領之亦有宰輔而兼
祠職者而徽宗以天子之尊而加教主道君
之號時琳宮之在天下奚啻萬區而三清老
氏之祠無處無之淄郡南鄙一舍許有山名

顏山雜記

一卷

五

峩嶷籠水出焉峯巒秀麗爲諸山冠宋大觀
己丑有賢而隱居黃冠曰張道源者樂是山
之岑蔚像玉皇而宮之松竹亭沼之勝蔬果
魚鼈之饒絕跡塵外以俟世路清平□爾道
源旣死宮亦□灰靖康之亂迄聖朝廷祐于
今百禩無慮六七作至泰定初年摧敝又有
甚焉鄉耆胡深王福儿二十輩鳩金僱工圮
而復營於是神路有門靈官有堂百年朽敝

復爲偉觀苟無此新將遂瓦礫荆榛而已爾
其如摩天蒼檜何是宜裨之以作義氣 前
鄉貢進士東洋李源撰 新授臨江路新淦
州蒙古學教授胡從善書 益都路益都縣
典史張 益都路益都縣顏神鎮巡檢時
進義校尉益都路益都縣主簿周 承務郎
益都路益都縣尹管諸軍奧魯勸農事喬汝
楫 將仕郎益都路益都縣達魯花赤兼管

顏山雜記

一卷

六

諸軍奧魯勸農事忽都帖木兒 至正二年
歲次丙子二月日

虎山 虎豹崖 虎者武也當鎮城之北方以

填水口謂玄武也有玄帝之宮焉又山雖小
而作意大有力如虎也豹踴躍也

英山 鵝鴿崖 削崖臨水棲鳥起于壁間與
虎山夾處以助其力焉

東阜 卽荆山麓也下臨秋谷上有盤石廣平

俗謂范文正公讀書臺猶虎丘千人石也以僻處也隱而無名在城東偏

黑山 環城諸山多青石此獨黑取而煨之一石石得二斗鐵孝鄉之釜蓄磁犁是取資焉郡志謂言林木蔽虧常如晦冥聞之不詳也在峩嶺東十五里

礬口嶺 自土門道至青石關二十里兩山夾谿崖壁峻竦巖樹交參單車徐引數步一息

顏山雜記

一卷

七

時則秋泉鳴于空峽谷鳥弄于陰林夕日層陰徘徊屢顧誠樵隱之槃居羈塗之逸駕矣參政四明陳沂詩萬嶺千山一道分向空盤磴歷青雲丹楓黃菊爭秋色白石蒼崖共夕曛長劔倚峯當而立淨琴流水傍車聞秦關蜀棧無踰此絕險真穿虎豹羣副使吳郡王世貞詩千秋此夾谷駐馬意徘徊蒼嶺峯爭向青天線劃開人疑懸索度水

憶建瓛來回首兵車地虛生命世才

里人孫寶侗藥口道歌藥口道中谿谷黑青
石關下萬石塞馬踏石稜盤空行俯身北下
愁傾側前山回合路欲無夾岸高峯向人逼
有時疊嶂如連城白日蔽虧生暝色秋高萬
樹紛紫翠黑者露潤垂秋實山鳥不鳴秋已
深猛虎高臥夜畱跡長弓在背箭在腰蠶叢
自奮千夫力憶昔左車誇井陘宋武大峴快

顏山雜記

一卷

八

所經道左馬陵伏神弩天畔壺關擁地形又
見此地設天險九州則壤分徐青周家青社
胙茅土山陰則齊陽則魯伐齊曾記哀公年
艾陵一戰雄千古先克博邑後克羸此地川
岩映赤羽當年南北阻巖關夾谷臺高拳水
滸 聖代一統亭障空青濟分疆開二府
白羊水落羣山高天末秋風吹錦袍騰逃山
鬼奔蒼鼠無限寒光照寶刀

禹山 去城西十五里爲王大嶺四望層巒起
伏森森如連波孤峯竝立萬山之表時有雲
氣浮浮帶其蒼岫雨則先起晴則後散城中
之雨候也

樵嶺 登團山而南望重岡合沓灌木塞塗是
樵嶺也其下開敞小有田居樵屋依岩三三
兩兩中多白石晴沙沈泉側瀨交影青林之
下炎陽朱夏失其酷暑樵嶺泉也今懸崖有

顏山雜記

一卷

九

洞去地百尺猿引而上容數百人土人避兵
處也在城西南十里

八子砦 北爲深谷西爲門東南皆巉岩不可
以上對谷有人家茅屋啣山半裂石間有洞
在巖際不可梯攀中多夜明砂土人歲一取
之繩崖而入在城西十里

石馬山黃紅峪在城南三十里

趙進美黃紅峪記并詩村居日已踰亭午客

有談黃紅峪之勝者率而命塞過墟落阡陌
數里陟山麓山率磅礴爭奇無所容不可往
至峪則岩盡立林木皆俯忽有邃壑透迤而
開者秋潦之所出也人因以通焉奇石笏列
旣往卽攀援以登未里許導者邀予遵左岩
之足猿引以上予恃掖者掖者恃蔓葛影皆
遙懸至一洞仰視其戶猶在百尺巔登者手
口膝足皆倚于石如將入焉所倚各相附始

顏山雜記

一卷

徐移其一不可上下視不知所至惟聽于石
踞洞而望重山蒼然危岑傾岫異勢而同賞
古巖對峙雜木森拔時見一二人出沒鳥巢
枯葉間風颯颯不止良久而下復循峪以入
山愈迫石愈瘦而壯細流齶齶鏘然鳴答巖
半有小泉甚湛冽落苔蘚中散流若無遊者
至此忽自見其影在石上乃共嘆悵焉初至
第三潭潭淺而澄寒石相依寂寞幽潔若爲

冬意所束又百餘步則第二潭皆水矣石氣
互映不可辨冰上有枯樹痕勁枝頽榦皆如
畫復進則石之或植或臥咸丈餘錯愕相承
初謂徑且窮旣數踰之衣袂泠泠有聲受吾
趾者皆若奔雲積雪目力所聚惟蒼寒肅肅
而已初潭淵瑩秀微石環之以鑑其古貌嵯
峩參差大者箕踞小者旁睨而以潭也則意
益孤勢益嚴致益冷而潭亦因石以成其靜

峪至此且盡巖旣合而怒起數百丈老藤盤
蜒空遊異木交蔭夏秋間來石上者不見星
日瀑布乘巖首而垂飛沫四濺潭上之石皆
不可坐臥潦水旣收潭石皆定人始得近狎
之而猶凜然慄慄神淒息歛若無依也峪旣
窈窕幽窅層障阻蔽暝色冉冉方自衆山來
而遂已先暮潭石清寂出其光潔並以照人
歸者如行淡月中忘吾勞焉

巖冬方凜冽，絳風沐寒疇。空林依積雪，寂寞發奇遊。瑛色入鴻濛，岩靜清潭幽。微雲翼孤峯，素石鳴潛流。絕壁無晦明，日夕蒼烟留。嵐氣何處滅，時見歸鳥投。陰壑雷雨古，山光草木收。苔潔含晨水，返照披暮丘。衆岑相波濤，渺如漾輕舟。

西阜 當禹石門外之巖崖也。

孫廷鐸清明飲西阜詩天亦愛時節風恬物

顏山雜記

一卷

三

自清以君臨水意動我看山情野圃垂新柳
春城上舊鶯蕭辰多勝事隨意一班荆 壺
觴雜坐臥徙倚晚烟生自覺憐同調誰能惜
宿醒席邊芳草合眼底李花明不有石門唱
那知物外情

〇〇水泉

青州之水載在禹貢曰海若淄若濰若汶 南汶

若濟旁見於傳乘曰澠廣於水經曰汶 北汶 若

膠若巨洋皆川水也禹堙洪水除菑害疏貢道

則已非是不書蓋舉其大而細者可畧也大禹

既沒陵谷變移尋經脉水時有牴牾故桑欽又

詳之蓋舉其細而大者可按也海納百川川納

衆流一勺之多亦歸溟渤匪是則河海無以成

顏山雜記

一卷

三

其大故酈道元水經注別山窮谷錄及涓泉野

渚滄潭悉歸掌故蓋舉其纖而細者可盡也若

又其隱者泉生階祀清瀨時聞澗起雲根秋泓

乍瀉事已微矣非其土著孰記潛源聊舉昔人

所遺復綴於此非其境者雖近不錄焉

大洪泉 又名白雲泉 在鳳嶺之陽阿巉岩壘

疊相承如版幹怒濤裂石而出水竇處可濶

八尺高六七寸傾岩爭吐石淙懸注下激深

潭驚湍急峽恍忽動搖每清秋霽夕綠溪洄
溯雪浪飛寒覺微風扇於蘋末臨石徒倚如
霧露沾人雖去之若遙砮雷之聲猶自在耳
按黃河之下呂梁謂之洪言其驚急而盛大
也郡乘訛爲打閩或又從而實之鄙俚無文
失其趣矣

趙進美白雲泉詩猶借危岑勢獨宜幽者聞
色侵寒石淨聲自亂雲分晴動蒼蘿徑秋生

顏山雜記

一卷

四

白鷺羣壺觴莫早返畱看月紛紛 奇雲吐
潔岫遠似此泉光但在溪聲內同分山氣涼
風烟接瀲灩城郭入青蒼前浦孤峯下森森
魚鳥鄉

藥王泉 出大洪泉下白石碾砢荇芹蒙密吹
浪翻瀾汨汨四出以上承洪泉之頽波不辨
其際但覺水面至此乃突而高洪水有涸此
泉不絕

白羊河 出西山流入甕口道亂流齒齒數里
行積石中水南有巨石臨倚方廣若三間屋
亭亭如波上立下則晴沙散雪吹影鏤紋夕
陽微射時觀沙面如縱筆奇書恍恍無定悉
天然二寸魚與石旁木葉秋花相映時則稱
此石爲釣魚臺其水東去又入石礪中壁門
斗絕無復寸土束隘爭鳴落石潭中曰黑石
之灣又北帶麓泉水以入羣水也

顏山雜記

一卷

五

麓泉 出黑石灣下河東岸側

羣泉 出大洪泉百步外顏文姜祠下深源靜
闊滙爲清池深可丈餘浮泡泛珠吹沙湧起
澄淨寒徹不掩針芒藻翻荇搖皆可辨數其
上虛簷翠栢負日高寒臨斯池也靡不倚檻
徘徊繡煩易慮者矣水出祠外與大洪泉水
合逕踐積石悉成湍瀨峩嶺之陽諸山泉水
左注之鷺立鳧投小石淙瀦乃行峽中石梁

起於絕壑闌干橫帶兩山過梁支離泉柳林
泉水右注之北流逕西寺閣前黃石起於山
根輕湍爲之洄注至鎮城西北范河口范水
左注之又北沙溝山水右注之又北出於兩
山之間是爲虎山矣其水半瀦深陂半流石
上又東北後峪諸山泉水左注之又屈曲西
北石曰河水右注之又北至般陽與般水會
趙進美季泉詩逶迤近桑梓觸事皆可悅矧

顏山雜記

一卷

六

茲曉山淨復對寒泉潔寥寥廣殿虛肅肅涼
風發弱荇搖中池素濤散成雪石壁瀉微雲
鳥聲弄清樾倚欄蕩塵纓顧影傷短髮十年
困奔走望遠意飛越何當耕溪濱放歌甘薇
蕨○惆悵石橋古樹涼天涯行李豈能忘已
知山意多秋雨自聽泉聲到夕陽

支離泉 出鳳山峽口本沙泉細水面枯旱不
竭昔有道士劉支離呪此水有奇異立碣書

符於泉上石蹟猶存今移於山上玉清宮其
詳不可得聞

柳林泉 出支離泉下苑柳繁陰可枕可漱

二女泉 出城南峩嶺之北麓東西有二泉東
泉清潔珠而不藻西泉淵闊藻而不珠泉南
舊有二女堂今四角石礎猶存蓋聞昔有二
女閔其父母老獨無兒遂乃共誓不嫁投身
淨門以資供養泉上是其出家之處惜其碣

顏山雜記

一卷

七

石湮滅事蹟難詳其曰龍泉曰珍珠泉者皆
後人之所目也夫畫龍不靈照乘非寶忍沒
獨行成斯淺義因緣乖格未謂愜然泉上今
爲龍泉寺桐栢鬱鬱香臺閒靜以近山也鳥
聲多而人迹少時聞僧伽讚揚清梵值秋高
氣微則萬柿垂紅於金字丹魚吹碧於淨池
此焉棲息亦爲勝因水出寺北流逕趙御史
班璽園亭至於城下半入水門半落隍中西

流北折同入范河以歸孝水也

趙進美疏泉記 龍泉水入南城而支焉又
遶西城外城中西南人皆臨水而居日得一
人合城中西南人其得不計矣今歲旱泉不
能出日失一人合城中西南人其失不計矣
合城中西南人而出之或一人或一日或數
人或數日耳其得又不計矣塞旣久泉必他
溢若大雨泉不能出然能沒也彼時出之其

顏山雜記

一卷

末

失又不計矣衆計必能知此崇禎十一年五
月二十八日余姪世榮實倡利濟之舉壘壘
新流長幼沛悅爰刻同言以識始作

孫廷銓過趙侍御園亭詩我屋青岩側君園
碧水潯蒼茫連一徑蕭緘寄遙心泉落山皆
響門深柳自陰坐來幽興愜聽徧應時禽○
小築非時就孤亭羨此安人家分水石吾土
富林巒病覺抽簪好官虞避地難終當茅結

屋渾似此中看

范泉 出東阜范文正公祠堂下祠前臨秋谷
澗道迴合舊宮喬木其泉流入澗遶樹穿林
木葉泉聲瀟瀟響答文正微時讀書處也按
文正父爲淄青記室客死文正少孤育於長
山朱氏因名朱說嘗讀書長白山醴泉寺斷
壘畫粥刻苦勵志及登第乃易姓名故其表
曰入境遂稱張祿乘舟偶効陶朱以秋谷之

顏山雜記

一卷

九

接迹長白實爲勝地伏讀樓尋其有由然近
居人於此谷上遠駕石梁平通山脚接引泉
水遂乃於梁上跨谷分流每尋梁憇集虛谷
來風青岩阻日弄溪光拾澗藻石梁上下南
澗北流東泉西逝月淨波明宛成十字濠梁
之性樂以忘還其水逕乎城中與二女泉合
其支流之不上石梁者循山旁注逕趙濟美
涼洞亭南落入於澗皆於城北會爲范河以

歸孝水也

分署通判平定和清遊范泉詩 龍泉之東

秋谷口瀉出寒流激瓊玖誰種長松綠蔽天
繫雲兩岸垂楊柳涼透襟裾暑氣微范老藏
修歲時久雲間片石讀書臺籃輿直上荆山
陡平看翠壁夾長川鳥鳴不見紅塵走相逢
月色滿山堂况有清人載斗酒岡南岡北盡
桃林問花開後還開否待得春歸約再來尋

顏山雜記

一卷

平

真肯負攀枝手恣遊何處問高風千載古人
吾尚友

孫廷銓初春賦退後偶過范泉詩 晴嶠猶

照石牀書樹杪危欄晚眺餘石引泉聲成宛
轉雪殘山意上清虛條風微欲迎玄鳥弱荇
春來聚白魚斗酒相呼頻未厭近時憂樂倍
躊躇

趙進美同題 風日今晨定山烟盡作春艱

難郭外意珍重亂餘身溪色分晴遠城寒借
柳新清吟同倚杖幽磬更依人○又歲暮飲
家岐叔秋谷園亭 樹暗溪聲遶山明日氣
啣雲霞寒入座冰雪靜依巖謝客烏皮儿長
歌白木鑿薜蘿春欲發三徑莫全芟○又別
墅作效晚唐 十里嵐光烟後新蕭蕭灌木
照溪濱青鞋短杖尋山誌白石寒泉隱士身
斷續蟬聲草閣雨高低驢背板橋人北窓柳

顏山雜記

一卷

五

色風吹入薄暮雲歸滿四鄰

雙泉

觀音泉

沙泉 皆出范泉南秋谷中北與范水合

馬君祠泉

張一泉 皆出西山旱溢無時夏秋水漲則鄰

鄰成川同爲沙溝河以達孝水

孫廷銓晚秋過馬君祠詩 孤村人境外烟

火負巖居茅屋圖堪傲霜林錦不如峯迴看
路誤木落識天虛日夕狂歌起依稀是接輿
○小圃深蕪壑危峯欲造天刈葵千樹露蒸
棗一林烟山勢連愚谷溪流似冷泉翻愁車
馬過蘿徑最高懸

務子泉

倒流河

梁莊泉 皆出東山合流逕彼岸寺南入於孝

顏山雜記

一卷

三

水按後峪村彼岸院金世宗大定四年勅建
有尚書禮部牒文刻石院中餘文剝蝕不可
辨讀矣其寺後枕山阿前臨溪水平泉深柳
可以植蓮菱泛鳧鷖爲勝觀也

按水經注隴水南出長城中

舊注當作瀧水

瀧有雙籠二音

東北流至般陽縣故城西南

與般水會水出縣東南龍山俗亦謂之爲左
阜水西北逕其城南王莽之濟南亭也應劭

曰縣在般水之陽縣資名焉其水又南屈西入瀧水北逕其縣西北流至萌水口萌水出西南甲山東北逕萌山西東北入于瀧瀧水又西北至梁鄒東南與魚子溝水合水南出長白山山東抑泉口山卽陳仲子夫妻之所隱也孟子曰仲子齊國之世家兄戴祿萬鍾仲子非而不食避兄離母家于於陵卽此處也其水又逕於陵縣故城西王莽之於陸也世

琅山雜記

一卷

重

祖建武十五年更封則鄉侯侯霸爲侯國其水北流注于瀧水瀧水卽古袁水也故京相璠曰濟南梁鄒縣有袁水者也瀧水又西北逕梁鄒縣故城南又北屈逕其城西漢高祖六年封武虎爲侯國其水北注濟其城之東北又有時水西北注焉

青州府志古季水一名籠水今季婦河也北注般陽般水入焉又北逕長山縣西又北逕

新城縣西又北入于小清河抵高苑博興樂
安又東北高家港入于海

小清河卽濟水之支津也

顏山雜記

一卷

古

〇〇城市官署緣起

余行萬里而歎人事之治亂靡常地氣之盛衰有故也或都邑而廢爲丘墟或鄉聚而蔚爲奧府其將興也賢必衆多其將廢也俗必先壞不可不察也季鄉于古雖無專城然其郊于齊魯則大國也錯于淄青則雄州也南接秦嶽其山鬱儀以嵯峨猶岱畎也季水洋洋潤數百里卒放乎清河以達滄海猶濟滌也古者巷有人亭

顏山雜記

一卷

五

有長到今傳之有賢則名地不在大矣有明隆萬以前季鄉爲青州巡道之治府巖關巨防阻三面以制十八城亦形勢之宗也一女煽亂三勤王師變起蒲臺禍延長峪鎮之驚豈鎮之孽哉世宗之世名賢作鎮繕我城隍綏我父老筮絃俎豆以安經鋤百餘年間彬彬乎興於禮讓文學矣

巡檢司

宋以上無考今按顏文姜靈泉廟金

皇統元年碑載淄川縣顏神店巡檢徐□庵
上村白雲觀元至元二十七年碑載益都縣
顏神巡檢馬受則巡檢一官自金元已有凡
歷五百年至今因之也

撫按行臺 弘治八年山東撫按以顏神鎮爲

地方要害建立行臺一所常川巡行駐節

按察分司 正德五年添設青州道兵備僉事

一員往來駐劄每歲在鎮□個月建城以後

顏山雜記

一卷

庚

地方無事巡道常川駐府城非有公事不至
鎮城矣

青州府通判分署 正德十二年巡按御史黃

□奏請下兵部議覆看得顏神鎮南至萊蕪

縣兩山夾立接連新泰蒙陰山嶺北鄰淄川

長山牟婦河水拖遶地勢險要山川環抱軍

民雜處多有以強欺弱以衆暴寡又兼各縣

挾分土分民之私以致羣盜借出此入彼之

險題奉欽依添設青州府捕盜通判一員在鎮專管防禦兼轄新淄長萊等縣地方有警卽調遣兵馬聽其約束萬曆二十年本廳通判劉芬桂上請兩院奏准頒給關防一顆崇禎十二年朝有裁府廳添練備之舉部議將本廳衙門裁革鄉官兵部尚書仇維禎等具呈廳官萬不可裁兩院奏准復舊

附隸人 正德十二年兵部題准設通判遂

顏山雜記

一卷

七

奉撥青州道團操快壯五百餘名在鎮操演防守取食於淄新萊壽高蒙六縣載入各縣賦役全書後因承平日久各縣災傷陸續裁減尚存快壯一百六十名至順治五年盡裁去

萬曆四十八年嶧縣蓮賊作亂本鎮通判李延芳請添兵防禦准撥青州營兵一百員名又召募新兵一百名益都縣設處工食在鎮

鎮守事平始撤

按本廳設官以來其有政績生祠者 南
樂魏怡、祠在秋谷范公亭後 關中趙存
誠祠在鳳皇頂上 關中李延芳祠在顏
文姜靈泉廟旁 桐城齊登輔祠在永濟
大橋東畔

附設官議三則 一廳屬兼轄四邑不當改
去按濟南李攀龍顏城碑記四方亡命嘯而

顏山雜記

一卷

夫

過市百數十年、冀氏姚氏九爲倡亂以毒我
百姓蕩我廬舍至今一妖女子三勤王師兵
部設官議云各縣挾分土分民之私以致羣
盜借出此入彼之險是往昔顏山之亂、非必
土人之爲之實四方逋逃不可究詰之爲之
也四邑旣歸疆索百年遂靖萑苻效可觀矣
一旦謂區區郡倅無事此穰穰者爲遽削而
去是嚮其利乃忘其功去其害又辭其費本

未輕重未深權也一團操快壯不當全罷無事而養土兵與有事而調客兵利害孰多計眉睫者必曰客兵使事至而集事平而罷費不加長兵不加募也故客兵便懷遠算者必曰土兵便安其田廬習其險易釁不外生民不內擾也故土兵便試就前事權此二議彼亂者九起王師三勤計其爲費必不減於五百團操民快之口食明矣一通判旣專城本

顏山雜記

一卷

堯

鎮不當頻數視篆他邑是官之設旣號賊曹非望以焦頭爛額爲功將借以建威消萌爲重况鎮城之衆視下邑不啻倍之鄰山逼近去縣復遙穰穰待命累月無官鄉之人卽欲親鄰善俗不煩雀角其如越境暴客輕肆狗偷何顧其才者旣樂觀繁劇之事不耐端居其賢者卽欲以雅俗坐鎮爲心難違上指豈寧鎮人望治之情恐亦非初議設官之意也

石城 嘉靖三十六年本鎮舉人趙敬簡等議
本鎮雖有捕盜通判一員出入無條條可屬
進退無城池可守誠所謂獨坐窮山放虎自
衛者也請建石城保安地方兵備道副使王
世貞據以上請巡撫都御史傅願巡按御史
段顧言行青州府知府李尚智本廳通判倪
雲鵬諸城知縣李永康臨淄知縣衛心親詣
本鎮率耆儒鄉民踏勘卜吉督工建城閱三

顏山雜記

一卷

三

月而告竣。周五百丈門四南曰龍泉北曰范
河東曰荆山西曰禹石水門三一偏龍泉而
西一偏禹石而北一偏范河而東崇禎間漆
作瞭臺八小水門一當荆山門下南受二女
泉水入城分爲二一沿城脚而西入于文廟
泮池出逕石橋又北逕府館折而西出西水
門一北流至于隅首又分爲二一沿西街而
西至石橋與泮水合一北流逕東隅首出北

水門東受范水西流至于隅首與二女泉水合府館在城西街文廟在其南行臺在其東城隍廟在南門內義學在北街此城中之大畧也

城西之民夾禹石門而西至于隅首有橫街北出郭門而近南出郭門而遠東負郭稍南負峩岩西枕孝河是爲大街大街北出亂河而西起于西寺之崖陂陀而下北至于疊

顏山雜記

一卷

三

道西負崖東枕孝河爲西冶言琉璃之鑪冶也其民多業琉璃大街南出過山峽石橋山房高下環泉而居炊烟三接水石間之北負峩岩西依鳳山之麓南望黑石之灣爲神頭城東之民夾荆山門而東南負峩岩北枕范河抵澗道折而南至于雙泉爲秋谷口城南之民傍峩嶺之阿屈曲斜連以逐龍泉之分流爲南道城北之民起于范河橋

佞則竊復隱虞焉爲諸父老城顏神者城之
已耶將縣之也城之而前使者以萬計囁嚅
旁喝迄靡敢動今不旋踵而告成事諸父老
業已受賦二百里外不勝其煩附庸卽百雉
之崇易易若是規而縣之則可縣之將爲若
置令若丞蝟役毛供斲人於衽席間哉而割
三邑之膏壤使其民與諸父老並削而敝筭
大左不取也語云見已事不能見將然卽令

顏山雜記

一卷

三

今決城縣利害與他日身所受本末岐異矣
然未可箸數而舌析姑以明余志耳余不佞
敢遂籍二三大夫士暨諸父老子弟姓名系
之碑陰而傳以銘 銘曰顏姜之山厥陽瀉
鹵夾谷造天縮轂其口萊新西控淄益東走
五民居之匪利南畝作爲奇袤卽山而取盜
鑄椎埋韋跖昧首矛鈐日尋何戎不莽唯余
睥目靡富靡穀本之不探而末是矚厲我父

老以勤版、築雍野、罄室壺、篳道屬、唯茲父老
藩屏是篤、石城峩、峩可以礪、鏃危岡、冠領腴
泉滋腹、在易有言、設險守、邦衛以武、師周以
崇墉、遏軋亂、萌毋使蔓、張毋若安、之薄征、厚
藏刃、鍛鈎喙、枉矢大、槍銷爲鋤、耰趣而農、桑
比屋、典讓遵、彼周行、牧臣罪言、敢告職方、
李攀龍、青州府志序、顏神可城、而不可規、爲
縣以官具、則民匱而險、不爲用也、

顏山雜記

一卷

肅

灌長氏曰、吾聞諸父、老城之始、卜也、其繇曰、城
不過百年、當盛、又百年而衰、茲溯厥生、初蓋盛
已久矣、明之衰也、災稜相仍、九州雲擾、通都望
郡凋落多矣、而此鄉獨完、今又二十年、而百堵
皆作、察其生聚、似又過焉、夫此石田、非加闢也
爲者、非加疾也、君子甚禍無故之利、而惜望外
之福、彼仳仳有屋、菽菽有穀、其謂此何哉、夫賈
人子、徒見微利、醉飽侈淫、驟獲而驕、不顧其後

固細人之情也。觀子弟者，視其父兄；觀齊民者，視其鄉大夫。以謂教行自上也。救敝之道，寧爲朴無爲，豪寧爲愿無爲，薄卽衰，可持盛，可蓄也。凡我鄉大夫，共慎此哉。

顏山雜記一卷終

顏山雜記

一卷

三